

韓大中丞奏議

韓大中丞奏議

受業

張之綱

編次

珠煩

次孫泰 華敬錄

卷之五

目錄

審辦藉災肆鬧鄉民疏

審擬邳州民沈維義京控疏

額懇緩徵錢糧疏

遵旨嚴密訪查疏

審擬婁縣生員王鳴謙京控疏

審明鹽城縣革監葛海濱京控疏

請添設巡檢酌裁冗員疏

請將降調知縣暫緩赴部疏

請陞補沿海直隸州要缺疏

請開復知州疏

米價平減並得瑞雪疏

請撥鄰省銀兩疏

審擬沛縣民袁欣祖京控疏

審明銅山縣民姜海京控片疏

遵 旨察看災區請加接濟疏

籌備災缺兵匠等糧疏

再行遵 旨確查據實覆奏疏

續獲邪教案內逸犯疏

審辦藉災肆鬧鄉民疏

奏為鄉民滋鬧府署一案審明遵

旨據實懲辦奏請

聖鑒事竊照婁縣鄉民藉被水災赴府求糧臨時鬧
鬧衙署等情先經臣等將嚴拏訊究緣由具

奏承准軍機大臣字寄道光三年八月十八日奉
上諭孫玉庭等奏鄉民羣鬧府署獲犯訊究一摺此
紊華亭婁縣鄉民恃眾在松江府署肆鬧擠毀衣

物拆打門牕擁入內署經提督帶兵彈壓方散當
獲馮寶元等九犯經該督等委員追究起衅根由
因知縣李傳簪面稟赴省請卹知府楊樹基以該
令祇須切實具詳不可輕離職守意見不合稍形
詞色外間流傳謂知縣進省為百姓求銀米知府
不肯滋事匪徒倡率滋鬧國家偶遇偏災不惜帑
金蠲緩賑卹如果地方官勘災卽報百姓自然安
定何致竟行肆鬧若乃頑之徒以捕風捉影之言

動輒聚衆此風亦斷不可長現據孫玉庭等將該縣汪淇等撤任派委司道大員前往查辦着卽將此案首從各要犯全數弋獲嚴詰起衅情節從重懲辦毋枉毋縱並密查該府縣因何不協輿情是否辦理不善據實嚴叅毋稍徇隱將此諭令知之欽此臣等跪讀之下仰見我

皇上戢暴安良明慎協中之至意查此案臣等接據稟報卽委陞任知府梁蘭滋候補道錢俊先後

馳往查拏並令按察司林則徐親詣該處督同
究辦遵復飭據該司道府等就現犯訊供究出
嚴海觀吳松觀等各要犯獲案審得實情除情
罪尚輕各人證發交該縣就近分別羈押取保
勿致拖累外將緊要犯證嚴海觀等二十七名
提解至蘇臣文綺率同布政司玉輅按察司林
則徐候補道錢俊暨委員蘇州府額騰伊陞任
知府梁蘭滋等虛衷集犯隔別研鞫緣嚴海觀

吳松觀俱籍隸婁縣與李榮照莫高葉虎觀郭
茂沅朱茂春曹應瀧朱茂榮周在明吳坤發沈
紹榮張柳發張景星許立凡同住該縣四十三
保十七圖及隣近九圖等處楊廣榮籍隸華亭
各務農業徐春希係婁縣十七圖地保本年雨
水過多各處低田被浸松江一府婁縣較重華
亭稍輕五月下旬徐春希與別圖地保紛紛赴
縣報荒二十六七日婁民喧集縣署求卹勘

辦二十八日華亭婁縣鄉民赴府求飭縣勘該
府楊樹基卽掛牌示期六月初一二三日限該
兩縣履勘並分委經歷知事等員會同勘報比
華亭縣汪洪下鄉相驗順道查勘婁縣李傳簪
轉委主簿會同經歷勘辦維時節屆小暑連日
雨少晴多各鄉庠水補種尚冀有秋農心畧為
安定李傳簪不將被災情形稟報迨七月初二
日後連次大雨積水充溢災狀加重初五日婁

民又赴縣喧訴李傳簪始於初六日下鄉親勘因地保鄉農環繞籲求李傳簪恐人多滋事遂以親詣省垣面求上司多發銀米賑撫之語遍向安慰而回十一日李傳簪赴府面稟上省請卹該府以查辦災務各上司連札諄飭應辦卽辦無不准行只須切實稟詳不應輕離職守李傳簪因業經親許鄉民上省求卹被阻中止失信於民一時舉止失措不覺詞語齟齬因此外

間傳聞謂知縣已許進省為求銀米知府不肯
多准災分並不請發口糧轉向播告適徐春希
入城聞此流言誤信為實回至本圖並經過隣
近圖分信口傳說緣鄉眾正欲赴縣求糧徐春
希謂本縣已要進省求發銀米本府不准而止
必須赴府請給口糧隨約會鄉民於十五日各
攜飯蘿到府求食屆期徐春希與本圖之嚴海
觀吳松觀葉虎觀吳坤發沈紹榮張景星許立

凡許秀芳等先後進城並有別圖之李榮照莫
高郭茂沅朱茂春楊廣榮曹應隴朱茂榮周在
明張柳發夏長林張中璜莊勝吳漢岐封阿悌
顧樹春並馮寶沅陸沅隴王小貞許金觀夏藍
芳高三喜高餘發彭旭初王得榮蔡幅沅等及
未獲之嚴年觀戴孝章嚴孝章許紹良姚四觀
陸大觀沈茂林胡勤奎等均至府署喧求給發
口糧該府聽聞喧嚷出坐大堂諭以現在動碾

倉穀不日平糶並飭趕詳撫卹請賑令各安心
少待其時跪近公案之人既不聽聞明白其餘
亦不懂開導好言仍復曉曉求食且跪列在後
者因聽未清楚爭擠向前兼因是日適屆中元
俗例鄉民咸赴府署隣近之城隍廟燒香還愿
順道進署擁看地窄人多語言嘈雜莫辨逾久
逾形擁塞致將大堂暖閣外半截欄杆擠倒經
站堂皂隸大聲喝禁嚴海觀輒拾取欄杆木丟

及該府脚邊吳松觀亦將手執飯籬亂拋眾人
一齊站起該府被擠退堂嚴海觀又同吳松觀
打毀暖閣牕櫺偕眾喧嚷擁入內署隨手毀折
門牕桌椅該府喝令挈人嚴海觀吳松觀均因
未經聽悉該府開導之言轉以徐春希所述流
言為實嗔府不發口糧反行喝挈嚴海觀輒用
手毆該府肩上一下並未有傷吳松觀亦乘擠
鬧將該府紗褂撕破徐春希在場喝禁不住並

未隨同動手其李榮照莫高葉虎觀郭茂沅朱
茂春楊廣榮等各肆喧鬧助勢將臆桶什物拆
損曹應隴朱茂榮周在明吳坤發沈紹榮張柳
發張景星許立凡因見嚴海觀等拆打亦附和
扳損欄杆板片一二件並有許秀芳封阿悌顧
樹春馮寶沅等多人及朱獲之嚴年觀等俱隨
衆喧鬧擠看旋聞提督帶兵前來彈壓各自逃
散此嚴海觀吳松觀聽從徐春希赴府求糧事

前誤信流言臨時不懂開導以致頃刻猝成肆
鬧毆毀之實情也至府署坐落地段向屬華亭
縣所管界內該縣汪淇於前一日監盤金山縣
交代一事稟明本府上省未據通報公出是日
李傅簪到府稟見隨有衆鄉民喧嚷求糧該府
出坐大堂李傅簪輒回縣署嗣聞鬧鬧愈甚復
至府署因人數衆多不遵彈壓而提督帶兵已
至當獲楊廣榮及隨衆擠看之馮寶沅封阿悌

等共九犯復經該臬司暨道府等馳抵該處就
近訊究督飭縣管將嚴海觀等各犯陸續拏獲
擇要解省臣文綺親率司道各官迭次提犯再
四嚴詰俱各供認前情不諱一面錄供移咨臣
玉庭會核無異臣等以藉災肆鬧糾集多人恐
有預謀不法別情其毆官毀衣或尚不止嚴海
觀吳松觀二人復經逐一追究各犯僉供衆人
隨同徐春希赴府原想求糧是以各執飯籬並

無他械因擠倒欄杆被役喝禁倉猝動手率意
拆打今悔之無及除嚴海觀吳松觀二入外實
無毆官撕衣之人反覆質問加以刑審矢口不
移似無遁飾查例載直省不法之徒如乘地方
歉收挾制官長或因賑貸稍遲喧鬧公堂糾衆
辱官者照光棍例治罪又實在光棍事發者為
首斬立決為從絞監候各等語此案嚴海觀等
偶被水災業經委查催勘並非該府不准報荒

且散放卹賑為時尚早該犯等率聽地保徐春
希無據流言赴府求糧因人眾擠倒欄杆皂役
喝禁輒敢喧鬧公堂打毀署屋嚴海觀用手毆
官吳松觀撕破紗褂均屬目無法紀應照例以
光棍首從分別定擬嚴海觀合依不法之徒乘
地方歉收挾制官長喧鬧公堂糾眾辱官者照
光棍為首斬決例擬斬立決先行刺字吳松觀
隨同嚴海觀拆打撕衣合依光棍為從絞候例

擬絞監候秋後處決地保徐春希誤信流言轉
相傳播其約令鄉民赴府意祇求糧初不料嚴
海觀等輒卽鬧事致成毀署毆官重案但在官
人役率起衅端未便輕縱應酌發伊犁給種地
兵丁為奴李榮照等六犯喧鬧助勢拆損牕榻
什物亦屬不法應將李榮照莫高葉虎觀郭茂
沅朱茂春楊廣榮均發烏魯木齊充當苦差曹
應隴等八犯聽從附和扳損欄杆板片一二件

應將曹應隴朱茂榮周在明吳坤發沈紹榮張
柳發張景星許立凡卽於嚴海觀等死罪上量
減一等各杖一百流三千里吳坤發沈紹榮據
供親老丁單是否屬實照例行查取結核辦餘
俱分別定地發配折責安置許秀芳封阿悌顧
樹春馮寶沅王得榮夏藍芳高三喜高餘慶許
金觀王小貞陸沅龍彭旭初等十二犯先後隨
衆喧呼擠看並未毀物應與跑出宅門混拋磚

塊之禁幅沅並在場不能禁阻之地保夏長林
張中璜莊勝華吳漢岐均照不應重律杖八十
各加枷號一個月滿日折責發落以上各地保
概行革役顧義方顧仁昌王裕崑三名僅止進
內擠看均未隨鬧均照不應輕笞責釋逸犯嚴
年觀戴孝章嚴孝章許紹良姚四觀陸大觀沈
茂林胡勤奎等嚴飭勒緝獲日另結其餘偶然
附和之不識姓名鄉民現犯亦不能一一供指

且訊無打毀實憑概請從寬免再訪拏以靜災區而杜株累再撤任婁縣知縣李傳簪履勘已遲復以上省請卹空言見好致與本府意見參差轉相傳播因此鄉民赴府求糧猝成重案且臨事退蕙不克彈壓查拏洵屬溺職無能應請旨將李傳簪革職發往軍臺効力贖罪以肅吏治其撤任華亭縣汪淇於所屬災地早經遵示親勘尚無不合惟府署在所管界內且明知鄉民年

例中元進廟拈香理宜預防滋事近駐稽查乃於前一日率爾赴省又不通詳公出以致境內府署被鬧彈壓無員應一並叅

奏革職俾儆玩忽至松江府楊樹基諸事認真卽辦理災務掛牌示期委員會縣履勘係屬正辦迨李傳簪欲上省求卹正言規阻及鄉民羣赴求糧坐堂慰諭均能持正得體惟於汪琪監盤交代並非刻不可緩之務率聽上省究有不合

亦應請

旨交部察議除全案供冊咨送刑部外所有臣等審
明懲辦緣由謹合詞恭摺具

奏奉

硃批刑部速議具奏

審擬邳州民沈維義京控疏

奏為遵

旨秉公嚴審定擬奏祈

聖鑒事竊照江蘇邳州民沈維義赴京呈控堂兄沈維珂率眾將伊父沈克樸毆斃歷控未為提審一案經步軍統領衙門奏奉

諭旨此案着交魏元煜督同臬司陳廷桂親提人證卷宗秉公嚴審按律定擬具奏原告沈維義該部

照例解往備質欽此並准兵部將原告沈維義遞解到蘇前撫臣魏元煜未及審辦奉

旨調任漕運總督臬司陳廷桂旋亦奉

命進京臣催提人卷至省督同現任臬司林則徐逐加核訊緣沈維義籍隸邳州其父沈克樸係沈維珂無服族叔趙鵬五籍隸睢寧李志恂籍隸宿遷本係文生先曾赴京呈控李錦堂等滾利準地案內擬杖收贖旋因曠課斥革又於道光

二年扶從朱繼曾代葛嘉祥作詞京控朱義思等案內審擬杖徒奏結在案沈維義於嘉慶二十五年九月間由羅建借得開長春號藥店之溧水縣人章丙耀票錢四千文屢索未給章丙耀旋因虧本關店回籍託沈維珂作中將店貨項與譚惠疇接開道光元年二月二十四日沈克樸因店係沈維珂代盤持票向沈維珂索錢不給彼此爭吵沈克樸聲言如不代給定行拚

命經隣王全等勸回下午沈克樸飲醉私服種
地藥蟲餘剩紅礬至沈維珂門首叫罵李長青
經見拉勸沈克樸告以業已服毒欲與沈維珂
拚命卽奔入沈維珂門內被門檻絆跌倒地碰
傷右脚腕旋即毒發嘔吐亂滾又擦傷鼻梁等
處沈維珂倩人向沈維義家告知適沈維義之
母張氏患病卧床沈維義外出經沈克樸之弟
沈克玉前往查看用鴨血灌救不效沈克樸至

二十五日早殞命報經該州胡晉驗係服毒身
死訊供擬議將沈維珂問以重杖援

赦免罪詳結在案嗣沈維義因母張氏病故央馬慶
齋等轉向沈維珂求助不允起意翻告拖累當
向素好之趙鵬五告知並捏伊父向沈維珂索
討房價票錢爭角沈維珂喝令沈維倉等毆斃
賄串地保書差蘇懷薛佩玉等捏毒匪傷私押
賄和等情央允趙鵬五代作呈詞赴按察司具

控批行徐州府飭州究辦並將沈維義解回質
審沈維義恐審虛問罪在睢寧地方乘間脫逃
欲赴京控告因知素識之李志恂亦能作詞卽
至其家將控司詞稿給看懇作京狀李志恂先
不應允因沈維義再四央求卽照司詞情節敘
呈給沈維義赴京在步軍統領衙門控告奏奉
諭旨交審臣遵督同臬司親提研鞠究出趙鵬五李
志恂代作詞狀各情查提到案審供不諱質詰

不移案無遁飾查例載慕越赴京及赴督撫按
察司等處告重事不實並全誣十人以上者發
邊遠充軍等語此案沈維義之父沈克樸欲令
族姪沈維珂代墊歇業藥店之票錢未允逞醉
服毒前往圖賴以致絆跌碰傷毒發殞命報驗
訊明詳結乃沈維義因母故求助不允起意翻
告拖累輒捏沈維珂喝毆致斃並賄串匿傷重
情先後央趙鵬五李志恂代作詞狀赴訴臬司

復敢脫逃赴京混控實屬刁健沈維義合依幕
越赴京告重事不實並全誣十人以上發邊遠
充軍例發邊遠充軍趙鵬五代作司狀雖訊非
唆使聳恿但明知虛誣仍為代作亦屬不法趙
鵬五應於沈維義軍罪上減一等杖一百徒三
年李志恂代作京狀卽照司詞情節與趙鵬五
厥罪惟均惟該犯於代葛嘉祥作詞京控案內
業經問擬杖徒若從一科斷尚覺輕縱李志恂

應於滿徒上酌加一等擬杖一百流二千里與
沈維義趙鵬五分別定地發配折責安置沈維
珂訊無喝令沈維倉等兇毆情事惟於沈克樸
欲令墊給票錢時並不婉言理覆輒與爭吵致
釀命案殊屬不合前已擬杖援免例不重科地
保蘇懷等並未受賄捏報應與訊未說和發押
之馬慶齋焦煥等均予免議無干省釋屍棺飭
屬領埋詞稿供燬免追陰供冊送部外臣謹恭

摺具

奏伏乞

皇上聖鑒訓示奉

硃批刑部議奏

額懇緩徵錢糧疏

奏為江蘇等屬被水較重所有成災五分以上之
熟田應徵錢漕額懇

聖恩俯准照例緩徵以紓民力事竊照江蘇各府州
屬本年霖潦成災及間有受旱地方臣等業將
被水暨旱歉情形查勘確實奏請

恩施分別給賑蠲緩一面將各屬災區內應徵熟田
錢糧分飭該司道體察情形轉令啟徵去後先

經江寧布政使張志緒具詳復催據蘇州布政使王輅江安糧道湯藩蘇松糧道楊本昌會詳稱查例載成災五分以上州縣應徵熟田錢糧准於一體緩至次年秋成後徵收等語又嘉慶十九年江寧府屬之上元等縣衛旱災五分以上奏准將熟田新賦錢糧漕米概行緩至次年秋成後徵在案茲查江蘇各屬被水較廣間有薄收之處業佃賠費工本僅可稍資民食並

供本境來年穀種若仍照常徵收民力實形拮
据請將江寧蘇州松江常州太倉五府州屬成
災田地通境五分以上之高淳吳江常熟昭
文崑山奉賢上海南匯青浦川沙宜興荆溪太
倉鎮洋寶山等一十五廳州縣並蘇州太倉鎮
海金山等四衛幫應徵道光三年熟田新賦錢
糧並折徵漕價及屯田津貼銀兩概請緩至道
光四年秋成後啟徵其熟田漕米除寶山縣係

民折官辦應照向例赴道領銀採買起運外餘
俱免其徵運緩俟下年啟徵時再行搭運等情
詳請具

奏前來臣伏查江寧府屬之高淳縣蘇松等屬之
吳江等十八廳州縣衛幫被災田地業已懇

恩分別給賑蠲緩今該司道等復循例請緩熟田錢
漕雖江南為財賦之區臣等深知

天庾正供所關非細一經議緩則兌運糴米較少非

不殫心籌畫但今歲雨多傷稼為數十年來未
有之災卽間有薄收僅供餬口臣等仰體
聖主視民如傷不使一夫失所之

德意籲祈逾格

鴻慈俯准將高淳吳江常熟昭文崑山奉賢上海南
漕清浦川沙宜興荆溪太倉鎮洋寶山等十五
廳州縣暨蘇州太倉鎮海金山四衛幫成災五
分以上之熟田應徵新賦概行緩至來年秋成

後啟徵分別搭運以厚民生而重

國計臣等仍飭該司道等查造應徵銀兩及免運漕糧各欸清冊另行咨部察核再查江蘇有額徵起運白糧正米六萬九千餘石例於應徵漕糧內揀選春辦如遇災歉之年應於南糧內通融辦足本年蘇松等屬被災蠲緩既廣且多節經臣等將白糧一項飭行司道妥為籌辦茲據藩司王輅糧道楊本昌詳覆除被災尚輕之長洲

等十一縣及向係民折官辦之嘉定寶山兩縣額徵白糧正米三萬三千餘石仍行起運外其餘吳江等十三州廳縣應徵熟田錢糧既經援例請緩又震澤新陽二縣全境成災是各該州廳縣漕南等米均屬無收所有應行起運之白糧無從舂辦若於災輕各屬熟田漕糧內撥補事既窒碍難行或令各屬領價採買不但無款可籌且恐產地價昂有關民食查漕運全書白

糧一項並無不准緩徵之例詳請具

奏一體緩徵等情臣查核司道所議自屬實在情
形並懇

聖恩准將吳江常熟昭文崑山奉賢上海南匯青浦
川沙宜興荆溪太倉鎮洋震澤新陽等十五州
廳縣本年應行起運白糧正米三萬五千五百
餘石及隨正耗米並寶山縣折徵白糧米價一
並緩至來歲啟徵分別搭運還欸則閭閻生計

益寬感頌

皇仁更無旣極謹合詞恭摺具

奏伏乞

皇上聖鑒訓示

遵 旨嚴密訪查疏

奏為遵

旨嚴密訪查據實覆奏仰祈

聖鑒事竊臣奉到

硃筆密封內有飭查商蠹一摺敬蒙

硃諭有條奏此事汝可嚴密訪查斷不可令姦商朦
混也密之慎之欽此又於為黃滌泰調處寢息之

鏡澄和尚勾串奉

硃批嚴密查拏欽此 臣遵卽密飭常鎮道王賡言親
往查拏鏡澄旋據稟稱鏡澄已於本年四月十
三日病故將其徒孫證卓及管事人萬甫庭陳
敬中三名提到並密提運司衙門書吏楊綸賜
等質訊經 臣附片奏蒙

硃批嚴密訊究欽此 臣查原摺內稱兩淮首總黃濬
泰把持鹽務侵冒庫款結交勢要餽送苞苴直上
年散商鄭同瑞控案督 臣孫玉庭礙難澈底究

辦將就了案認賠銀三十萬兩完結本年鄭同瑞復控聞黃濬泰賄囑原告認誣銷案等語伏思鄭同瑞復控黃濬泰之案由都察院奏奉

諭旨交臣會同臣延隆秉公訊擬業經臣等按照原呈所控各款查出卷據於核訊後連次行查不但鄭同瑞情詞輸服抑且冊檔細數相符方敢於七月十三日會詞具

奏今摺內但稱黃濬泰賄令認誣不知臣與延隆

審斷之時並非憑鄭同瑞息結准銷實由查明
咨奏文卷定讞况睦務非臣專轄更屬無可瞻
狗隨提人證到案密加親訊綠黃濬奏於嘉慶
二十三年奏充首總三年限滿奏准畱辦兩淮
辦

貢辦公向不報賬奏明有案載入鹽法志從前每歲
用至一百五六十萬兩自嘉慶七年以後節次
減省道光二年裁去首總令各總商輪管值月

公項領銀奏定每年只准七十萬兩鄭同瑞控
及領欵經督臣等審明黃濛泰並無侵冒但經
理不善罰令獨賠三十萬兩鄭同瑞已結復翻
臣與延隆以供結尚可賄求印文斷難預假逐
條核究衆供僉同已於前奏縷悉具陳未便再
傳商衆多人又滋拖累惟原摺所稱有住居揚
州天靈寺之鏡澄和尚勾串幕友通遞信息每
逢散商揭告黃濛泰無不為之調處寢息又棍

商丁淮朋謀侵冒飽蠹分肥等語如果屬實亟應究辦查揚州並無天靈寺鏡澄係六合縣人自幼出家在江寧水月庵為僧常至揚州化緣言人休咎屢中人皆尊信與丁淮尤為親密每次到揚卽就寓歇黃濬泰向未往來嘉慶二十年前任督臣百齡查辦逆犯方榮陞一案係由鏡澄及其管事之萬甫庭訪知密告立時破獲奏奉

聖諭賞給萬甫庭五品職銜鏡澄所住廟宇官為修葺

正殿

賞懸

御書匾額每年給香燭銀一百兩卽於藩庫動支欽此
遂將水月庵改名正覺寺鏡澄聲價頓高募化
漸廣因於省城建清節養頤崇義集英四堂以
為卹養養老等善舉卽以萬甫庭經理堂務並
延生員陳敬中在集英堂管教學童鏡澄募積

厚貲並兩淮商衆公捐銀兩先後呈交運庫飭
商生息經前任鹽政阿克當阿奏咨有案鏡澄
按季前赴揚州支息占問休咎者日多罷小易
盈傲辟招怨以致謔言詆毀其實並無與總督
幕友及鹽政官員交結並為黃滌泰調處之事
今鏡澄雖故其徒孫證卓並萬甫庭陳敬中等
現均隔別訊供無異臣又密加徧訪確無別情
至丁淮卽丁恒興嘉慶八年派充總商嗣已告

退上年鹽政曾煥莅任面簽辦運年久之洪箴
遠等商充當首總丁恒興亦在其列未據具認
卽於冬月稟退黃濛泰當首總時遇有公議事
件以丁恒興年老運熟在衆商中首先向論往
往招怨生謗但丁恒興只係散商領銀辦公例
不同綱總列名又何能分肥侵冒其與鏡澄交
好畱住並代為催領季支息銀已據供認不諱
其摺內又稱運司書吏楊姓江姓與黃濛泰表

裏為姦之處查運司承發房楊綸賜工房江朝宗先曾承充庫書前任陞司錢寶甫訪知聲名平常因無實在劣蹟令各歸本房不許復入庫房辦事至今並未再派庫書卯冊可憑查運庫支放先由院司詳加核定飭庫照行非庫書所能上下其手如楊綸賜等果係表裏為姦則必肥家飽蠹今查提該書等被控文卷雖各有數案但俱係負欠細故控追莫償並無告涉運庫

舞弊事件再四研鞠僉供每發辦公銀一萬兩
商人給紙張飯食費八錢六錢不等由來已久
並非始自近年此外並無情弊又摺內稱黃濛
泰如果浮領卽應治罪實無浮領豈肯甘心認
賠等語詰據黃濛泰供稱公領之項一人獨賠
三十萬兩本非甘心惟商人業礙以來將本營
運積有家貲數十餘萬乃因充當首總辦理不
善致鄭同瑞藉詞具控牽累衆商錢陞司同常

鎮道斷令獨賠多金不敢不遵實出於萬不得已之苦衷况這些銀兩商人充首總時早已貲墊應只須應領之日扣繳現在業已扣楚有收銀印諭可憑隨提運司庫簿開明黃滌泰認繳銀三十萬兩於本年三月十三日照數扣繳臣恐仍係通綱商取領款飭據運司傳問鮑有仁等供稱上年上半年公事都是首總黃滌泰一人已貲墊辦實係執發在前扣收在後並非

公攤在取商領款內扣收今黃濬泰撤去運本三十萬每年他名下就要少運幾萬引通綱共知並據鮑有恒等各總商出具畫押親供前來至摺內所稱餽送苞苴查據新任運司毋庸迴護之張青選密稟近今各官似無此簞簋不飭之人臣又慎密周訪洵屬毫無影響復提黃濬泰等切實根究據供商等專運淮南口岸情形與淮北不同從前殷商甚多結交應酬有求必

應近年商力消乏許告成風卽如鄭同瑞原是
富商如今負債數十萬妄想賄和就可完欠商
等若肯賄和也不疊次被控了實在連年拖累
無辜但求公斷伏地痛哭情狀殊為迫切臣查
黃滌泰充當商總被控節次查訊並無侵欺實
據先經督臣孫玉庭等審明咎只辦理不善罰
賠三十萬兩

奏准免其治罪因鄭同瑞列欵翻控臣遵

旨與臣延隆會同秉公核訊提同原告逐款指查黃
滌泰並無弊混雖律不重科但疊被散商訐控
究係取論不孚擬請革退總商茲蒙

殊諭密飭訪查臣何敢不實力推求稍任姦商朦混
惟反覆研追別無罪狀可否仍照前奏將黃滌
泰革退總商作為散商隨同辦運之處伏候

聖裁丁淮卽丁恒興訊無朋謀侵冒情弊其暫畱鏡
澄借寓代領息銀事屬交際常情應予免議故

僧鏡澄募貲築堂雖係善舉但妄談休咎惑眾
招尤亦有不合業已病故應毋庸議僧人證卓
及職員萬甫庭生員陳敬中訊無別情均予省
釋書吏楊綸賜江朝宗先經退出庫房各歸本
房辦事雖查無實在劣蹟但聲名平常均卽飭
令革役尚有被控錢債等案若將人證提省質
審轉滋遠涉拖累應遞交該府縣分別追究照
例治罪其得受紙張飯食由來已久本屬零星

且無確數應免究追至鏡澄創建之清節養頤
崇義集英等四堂經費章程悉有案據應飭江
寧布政司就近確查應如何酌派官紳妥為經
管俾善政惠民經久無弊通詳會核辦理所有
遵

旨嚴密訪查緣由謹據實覆奏並恭繳
硃諭原摺黃封各一件伏乞

皇上聖鑒訓示

審擬婁縣生員王鳴謙京控疏

奏為遵

旨審明定擬奏請

聖鑒事竊照婁縣生員王鳴謙令雇工王升赴京呈
控張明揚屢吞租米並金山縣書使顧文等浮
收漕米一案經步軍統領衙門奏奉

諭旨此案着交韓文綺親提人證卷宗秉公研審定
擬具奏原告王升該部照例解往備質欽此並准

兵部將該原告遞解前來遵卽飭提原被人證
到省臣親核卷宗逐一研訊緣主鳴謙籍隸婁
縣伊父王元俊在日先於嘉慶二年一年買得
王象徵坐落華亭縣田四十畝四分係張明揚
佃種每年應還租米十石四斗七升張明揚藉
口田土瘠薄欲圖減租拖欠未還王元俊赴縣
呈控飭差催追旋經王元俊將張明揚之子張
金扭赴縣案提訊枷追因租不清還尚未釋放

二十二年正月初間張金之妻郭氏至母家拜
年欲做粉糰給送伊夫張明揚因伊子被枷不
放聲言不如粉糰內放些瀉藥使其腹瀉可以
藉病求釋本係一時信口空談並非實有其事
詎郭氏探望伊夫即將伊翁所言向夫轉述旁
人誤聽流傳被王元俊知悉心疑張明揚謀毒
其子計圖詐害輒行控縣張金枷號時王元俊
曾給縣差趙上飯食洋錢十元並因馮百堂等

常與張金來往疑其商串把持王元俊先後赴
松江府暨臬司衙門呈控批府飭委華亭縣汪
琪訊斷緣嘉慶二十一二兩年連值歉收酌令
減還米十二石其二十三年新租折算洋錢二
十五元以償王元俊租欠縣差趙上杖責懲儆
其得受洋錢勒追給主未據呈繳趙上旋卽病
故嗣因張明揚應還二十一二兩年租欠未經
遵斷清償王元俊復疊次控縣將張明揚枷追

遇

赦保釋避匿未到續欠嘉慶二十四五兩年租米至
道光元年冬間張明揚將洋錢二十四元並湊
錢八百六十四文繳縣作抵元年分租米又將
原出頂種該田價二十四兩作抵二十四年租
欠其二十一二五共三年租米仍抗不交王元
俊旋亦身故伊子王鳴謙節次控追未結此張
明揚欠租訐訟之原委也至原控縣書浮收一

節錄王鳴謙有應完王大洪等戶道光元年分
金山縣漕米十六石三斗七升零赴倉完納該
縣因米色不純當令風篩王鳴謙因篩搗過刻
米數虧折疑漕書顧文唐大椿等圖折浮收心
懷不甘一並具詞欲赴京控令雇工王升隨行
王鳴謙中途病回將呈詞交王升獨自進京在
步軍統領衙門控告奏奉

諭旨交臣審辦提集人證訊悉前情誠恐張明揚有

謀毒圖詐及該縣漕書勒折浮收情弊反覆研
鞠矢口不移似無遁飾查張明揚佃種王鳴謙
田畝並不按年還租任意拖欠屢違斷限實屬
刁頑張明揚應照不應重律杖八十漕書顧文
等雖訊無浮收情事但篩掬過刻卽屬有意刁
難顧文唐大椿亦均照不應重律杖八十各折
責發落顧文唐大椿仍革役張明揚認繳欠租
飭追依限全償再延提比書差金仲華張安訊

無弊捺唆害情弊均毋庸議王鳴謙因張明揚積年抗租訟延數載控非理曲其牽涉漕書浮收亦由篩掬苛刻起見事屬有因應予免議張明揚繳縣折租之制錢洋錢飭卽給王鳴謙收領其道光二年分租米聽王鳴謙自向接種田畝之保正彭金榮清理趙上應繳給主洋錢身死勿徵無干首釋除供冊咨部外臣謹恭摺具奏伏乞

皇上聖鑒訓示奉

硃批刑部議奏

恭壽堂奏議

卷五

三五

審明鹽城縣革監葛海濱京控疏

奏為遵

旨審明定擬恭摺奏請

聖鑒事竊照鹽城縣革監葛海濱赴京呈控縣書陳
松等勒索災費不遂串誣宿娼粟革一案經步
軍統領衙門奏奉

諭旨此案着交韓文綺親提人證卷宗秉公審訊按
律定擬具奏原告葛海濱該部照例解往備質欽

此並准兵部將原告葛海濱遞解前來遵卽飭
提人卷至首臣親提犯證逐一研鞫緣葛海濱
本名葛長年籍隸鹽城先於嘉慶二十年間李
瓚因姦致死吳文廣案內說合賄和問擬杖九

十援

赦免罪旋於二十五年間改名葛海濱在江寧藩司
衙門朦朧捐監生與監生李明諧民人程寶鳳素
好道光元年五月間葛海濱因天氣亢旱秧田

缺雨與李明諧程寶鳳商允藉詞報災請借口糧赴縣遞詞未准至二十六日各邀本處士民赴淮安府行轅具呈葛海濱雇坐娼婦陳玉子船隻當晚姦宿給錢二千文二十七日李明諧欲赴新河廟地方探迎淮安府投遞災詞亦雇陳玉子船隻並與姦宿給錢四千文二十九日陳玉子船泊鹽城縣西門河下葛海濱又邀李明諧程寶鳳至陳玉子船上飲酒經地保吳鳳

鳴查見禁阻不理稟縣僉差潘林等先後飭提
葛海濱李明諧程寶鳳等到案訊認飲酒宿姦
並查明葛海濱等具呈請借口糧維時已得透
雨田禾無傷係屬藉詞捏報詳請將葛海濱李
明諧監生斥革與程寶鳳一並究審依人戶將
成熟田畝冒告災傷罪止杖一百律各杖一百
詳結嗣據葛海濱之母葛楊氏李明諧之父李
采芹各以誣姦朦詳等情先後赴藩司巡道衙

門具控批經該縣訊虛仍照原擬具詳尚未發
落葛海濱希圖翻告脫罪開復衣頂又因與該
縣已革庫書陳松曾有訟嫌疑其從中串唆隨
捏砌陳松革役復充同伊族弟陳兆鳳勒索災
費不遂串役潘林等賄囑娼妓陳玉子誣指飲
酒姦宿等情赴步軍統領衙門控告奏奉

諭旨交臣審辦提集人證訊悉前情臣恐陳松等實
有革役朦充勒索災費串囑誣姦情事復加研

究不特陳松等堅不承認卽質之葛海濱亦自
認捏災宿娼並懷疑翻控不諱案無遁飾查葛
海濱因冒告災傷姦宿娼妓經縣訊明詳革監
生依律擬杖實屬咎由自取輒又冀復衣頂並
挾已革庫書陳松訟嫌疑其咬串赴京妄告殊
屬刁健葛海濱卽葛長年應照申訴不實杖一
百律杖一百程寶鳳李明諧除與娼婦陳玉子
飲酒姦宿輕罪不議外仍照人戶將成熟田畝

冒告災傷罪止杖一百律各杖一百均折責發
落陳玉子貪利賣姦律應擬杖事犯在道光二

年十一月十六日

恩詔以前應予援免所得葛海濱李明諧錢文照例
入官已革縣書陳松並非革役復充禮房經承
陳兆鳳亦未勒索災費應與訊無情弊之縣役
潘林宋榮蕭湘劉玉曹儀宋魁及地保吳鳳鳴
招書宋鳳池均予免議葛海濱李明諧監生業

經斥革所領實收俱已呈繳亦毋庸議無干省
釋所有失察土娼職名係前署鹽城縣知縣華
鳳喈相應開報附叅除將供冊送部外理合恭
摺具

奏伏乞

皇上聖鑒訓示奉

硃批刑部議奏

請添設巡檢酌裁冗員疏

奏為縣缺事繁應請添設巡檢酌將冗員裁抵以符缺額仰祈

聖鑒事竊據淮揚道沈學廉以淮屬之清河縣地方水陸衝途五方雜處自乾隆二十六年該縣移駐黃河南岸清江浦地方其河北一帶近多外來匪徒乏員巡緝請將淮安府檢校裁去在於清河澗橋鎮地方添設巡檢一員以便就近稽

查彈壓等情臣等察核所稟係屬實情隨批飭
江寧藩司會查妥議詳辦去後茲據江蘇藩臬
兩司查明清河縣地方河北一帶向無另設分
防人員今淮揚道因近年以來每多外來匪棍
勾結居民溷跡擾害如澗橋至漁溝等處遇有
滋事之案該縣聞報渡河馳拏各匪率多逃竄
實有鞭長莫及之慮其淮安府檢校員缺本無
專管事件係屬冗設請將檢校一缺裁去改設

清河縣分防巡檢在於該縣澗橋鎮地方駐防其附近之金城鎮劉皮鎮宋家集張家集及新興漁溝浪石等集均歸該巡檢稽查巡緝遇有島販及匪棍滋事並賭博鬪毆等項照例准其查拏解縣審辦如有承緝處分卽按分防處所照緝捕官例開叅所有額支廉俸及門子皂役工食銀兩卽以檢校衙門應得之項按數抵支毋庸增減其應添設弓兵工食在於淮安府六

縣皂隸等役額領銀內勻攤撥給檢校衙署因
乾隆三十九年水溢衝坍厯賃民房無可裁汰
今請移設巡檢仍暫賃民房俟有款可籌另行
建蓋淮安府檢校鈐記應飭繳銷另請鑄給巡
檢印信以昭信守其新設澗橋巡檢員缺請定
為簡缺江省現有應補人員另容遴員請補至
現任淮安府檢校曾疇一員撤回畱省另補謹
將酌裁冗員添設巡檢以資勦理緣由謹恭摺

具

奏伏乞

皇上聖鑒訓示奉

硃批吏部議奏

恭壽堂奏議

卷五

望

請將降調知縣暫緩赴部疏

奏為因公降調知縣現有承辦要務懇

恩暫畱經理事竣再行給咨赴部仰祈

聖鑒事竊查阜寧縣知縣王錫蒲前署吳江縣任內
因有事主袁岐昌被竊臨時行強並任崧被竊
臨時拒捕開列疎防及二叅各職名分別

題咨接准部覆議於現任內降二級調用無級可
抵應行降調奉

旨此案因疎防一夜連劫二家議以現任內降級用
之王錫蒲着該督撫出具考語送部引見再降諭
旨等因欽此遵卽行司委員接署以便該員交代
請咨去後茲據江寧藩司張志緒淮海道梁章
鉅淮安府知府富斌以阜寧地方係繁疲難治
河兼三要缺民刁俗悍王錫蒲自到任後力加
整頓甫有起色該縣頻年積歉今屆全境甫獲
大半有秋亦尚有逼近黃河湖淤屯田及新淤

買陞等欸或因受旱或因積雨以致欸收須別
分欸熟核實徵緩一經交替更易生手則書吏
姦民勾串舞弊於

國賦民業均難稽核妥善又該縣漕糧民折官辦應
首先派兌正值採購新漕之際尤為目前要務
各請暫緩交卸以資熟手而免誤公該司因阜
邑素稱難治非精明廉幹熟悉地方之員不克
勝任州縣中合例而克勝治河繁劇者本不可

多得其卽用候補中除已補及委署外亦少人
地相宜之員其有一三合例堪調之人現有丹
陽丹徒江都等處出缺在前往返商定請調此
外實難其選王錫蒲降調本屬因公且奉有出
考送部引

見之

恩旨可否暫緩更替責令將要務辦竣再行給咨赴

部引

見恭候

欽定之處詳請酌核具

奏前來臣等查王錫蒲現年四十五歲係山西文
水縣進士由庶吉士改用知縣選授沭陽縣調
繁江都縣緣事革職捐復原官題補今職該員
精明勤練居心正派阜邑濱海臨黃地方遼濶
俗悍民刁藐視官長惟以健訟為能疊有豪棍
恣橫譁張京控各案自該縣王錫蒲到任力加

整頓查拏衿棍訟師解審究擬隨時懲治除莠
安良漸有成效甫值勘分災熟正資釐剔積弊
分別徵緩採辦新漕之際不特接手頗難其選
而新舊交替則蠹吏衿棍乘隙夤緣為姦於

國賦民生殊有關係據藩司道府咸以暫緩交替為
請覆察情形洵屬慎重地方要公起見臣等未
敢拘泥致滋貽誤合無仰懇

聖恩俯念地方現有應辦要務該員降調事出因公

准其暫畱本任一俟經辦災熟徵緩事宜及採
辦新漕完竣卽遵

旨出具考語送部引

見可否仍畱本任仍帶降級之案俟滿年限開復俾
資治理之處恭候

欽定臣等往返札商意見相同謹合詞恭摺具
奏伏乞

皇上聖鑒訓示

請陞補沿海直隸州要缺疏

奏為沿海直隸州要缺需員恭懇

聖恩俯准陞補以裨地方事竊照海州知州劉鈺稟
報蝗蝻遲緩意存諱飾經臣等

奏叅革職提究所遺員缺係繁疲難沿海要缺例
應在外揀調該州地廣事繁兼係私梟出沒之
區必得精明強幹之員方足以資治理查江蘇
所屬直隸州除海州外僅止通州太倉州二缺

均屬緊要未便請調臣等與藩臬兩司在於通
省州縣內逐加遴選非員缺緊要卽人地不甚
相宜實無合例堪以調補之員惟查有高郵州
知州葉機年五十五歲浙江定海縣廉貢由教
職屢獲洋盜選授山東金鄉縣知縣嘉慶十六
年調赴南河五次差委李家樓大江告竣

奏留江蘇補上海縣知縣十九年因經徵地漕鹽
課正耗銀兩全完

題請不論俸滿卽陞道光元年七月初八日奉

旨依議欽此並於補行嘉慶二十五年

大計案內保薦卓異赴部引

見奉

旨准其加一級回任候陞道光二年

奏陞今職是年三月初八日到任覆查該員才具

開展辦事幹練曾經調辦大工熟悉河務以之

陞補海州直隸州知州實堪勝任其任內止有

尋常叅罰除未議不計外僅止罰俸八年並無
違碍處分惟該員到任歷俸未滿三年與例稍
有未符但人地實在相需據藩臬兩司詳請會
奏前來臣等與河臣往返札商意見相同謹循例

專摺

奏請合無仰懇

聖恩俯念員缺緊要准以高郵州知州葉機陞補海
州直隸州知州實於地方有裨如蒙

俞允俟部覆至日給咨赴部引

見恭候

欽定其所遺高郵州知州員缺係沿河要缺容另揀
選請補謹會同河臣黎世序恭摺具

奏並繕叅罰清單敬呈

御覽伏乞

皇上訓示

請開復知州疏

奏為查明海州萌生蝗子知州雖稟報稍遲而督捕出力禾稼無傷究非有心飾卸懇

恩俯准開復仍請議處以昭核實事竊查前據淮揚各屬報有飛蝗過境隨時撲滅並未停落傷禾惟海州知州劉鈐稟報遲緩顯屬意存飾卸經臣等轉據藩臬兩司會摺叅奏欽奉

上諭孫玉庭等奏飛蝗過境請將稟報遲緩之知州

革職一摺江蘇江北各屬報有飛蝗過境並未停
落損傷田禾惟蝗蝻先由海州萌生該知州未能
卽時撲滅又復稟報遲延意存飾卸海州直隸州
知州劉鈐着革職提究該督等卽飭淮海道親往
督捕務期搜滅淨盡毋使稍畱餘孽並飭淮揚等
屬一體嚴查有無傷禾匿報之處據實叅辦其徐
州府屬地方旣據山東咨稱邳城與邳州接界之
處亦有蝗蝻該督等已飭令該府親往確查如有

蝗蝻匿不稟報着卽嚴叅毋稍諱飾欽此當卽轉飭欽遵確查稟報並經飭據徐州府知府俞穎達親詣邳州與郟城交界地方詢訪邳境並未生蝗實無匿報之事此外亦無傷禾匿不稟報之處先行

奏結在案隨據淮海道梁章鉅稟報親詣海州確查蝗蝻業已絕跡禾稼毫無損傷諮詢該處鄉農僉稱劉知州督夫隨時撲打淨盡該道因查

此案先於七月初旬據淮屬稟報六月十二
三等日零亂飛蝗過境當奉飭查來自何處據
安東縣稟報係由海州飛向西南過境該州劉
鈐於七月初一日始行稟報至十三日到省距
安東縣稟報有蝗之日已隔旬餘該州劉鈐因
何並不先事防捕及蝻孽萌生又未即時馳報
難保非先圖飾卸後見各處通稟始行補報面
詢劉鈐據稱該州境濱海遼澗旱濕沮洳蝻孽

易萌先於春間飭令鄉團督同農佃遍加搜窵
捐廉收買已盡詎因夏間天氣亢旱以致復有
孽生該州聞信卽親身赴鄉督捕彼時忙迫致
未及先行馳稟迨撲滅回署於七月初一日通
稟當時未將實在情形聲明致奉叅革其實委
無飾卸情事該州僻在一隅不通驛站淮屬等
稟報飛蝗實無見聞並非諱飾於前因他處已
稟始行補報等語該道因係一面之詞復督飭

署海州知州許文綬適歷鄉鎮確查詢訪鄉民
各稱州境瀕海潮後往來魚蝦遺子一經天時
久晴蒸熱易成蝗蝻前州先經督率民夫搜挖
已盡惟海潮泛溢難免續有遺畱夏間雨澤愆
期遂致間有蝗蝻孽生零亂飛騰劉知州聞信
卽親赴有蝗各處雇夫撲捕當時淨盡毫無損
傷禾稼衆口一詞核與該叅員面回情形相同
尚無捏飾是劉鈐於境內生蝗雖稟報稍遲而

親督撲捕當時淨盡不使傷稼並非有心諱飾
事屬可信定例地方官捕蝗不力應予處分今
該革員督捕出力官民皆無異詞似應邀請開
復原官仍將稟報稍遲之處請予議處以昭公
允等情由藩臬兩司覆察皆係實情詳請核
奏前來臣等恭查乾隆三十五年六月欽奉

上諭地方偶有蝻孽萌生或有先期雨澤稀少更值天
氣炎蒸勢難保其必無祇應就現有蝗蝻處所視地

方官之用力不用力以定功罪不必更問起自何方
等因欽此欽遵在案是辦理捕蝗之事應就現有蝗
蝻處所視地方官之用力與否以定功罪今已
革海州知州劉鈐捕蝗稟報遲緩飭經該管淮
海道梁章鉅親詣確查蝗蟲業已絕跡禾稼無
傷諮詢該處鄉農僉稱該革員督夫撲打隨時
淨盡並未傷禾並據署海州知州許文綬稟覆
遍歷查訪皆無異詞據該司道覆該革員劉鈐

平日辦事結實且督緝私梟屢獲大夥頗著微
勞今於捕蝗一事尚稱出力並未貽害禾稼祇
係稟報稍遲究無有心諱飾情弊查該革員劉
鈐由句容縣知縣准陞海州直隸州知州尚未
引

見可否仰懇

皇上天恩俯准開復直隸州原官畱於江省候補其
稟報遲延之處交部照例議處如蒙

俞允仍給咨赴部引

見恭候

欽定臣等往返札商意見相同謹恭摺具

奏伏乞

皇上聖鑒訓示

米價平減並得瑞雪疏

再江蘇災區仰蒙

聖恩蠲緩賑貸稠疊

隆施 臣等諄飭藩司分頭委員會同印官詳查戶口
嚴諭印委各員激發天良盡心所事業已陸續
報竣發項按期賑卹必使無濫無遺民沾實惠
各屬糧價因蒙

聖慈准免關稅招徠客販上游米船絡繹而來加以

撥項官為採買又有商捐義穀分運碾糶均不
至加昂臣孫玉庭前經

奏明委員分赴江廣各就近借款四萬兩買米運
回江寧省城平糶嗣因兩省知會恐全數動借
發買致長市價有妨本地民食當因江南糧價
既已稍平現有客販接踵前來即馳信兩省督
撫臣毋庸必照原借銀數發買轉致彼處居奇
長價茲委員鍾承露等在湖北省借款買米九

千石業已全數運抵江寧省江西撫臣程含章亦動項分飭所屬採購得米一萬五百石分起飭交委員領運回江除撥米三千餘石運赴被災較重之高淳縣以備平糶其餘均飭起貯省倉臣等伏思自冬徂春為日正長現在客販雲集糧價尚平擬畱於來春青黃不接時再行出糶此時各處災黎均已給賑其有城廂無業貧民為例賑所不及者臣等捐廉為倡董率地方

官妥為勸諭紳富各量力捐輸調卹桑梓共襄
義舉據各屬報捐數目自二三萬至四五萬及
十餘萬不等或設廠煮賑或按口給錢或買米
散放各舉公正紳董自為經理不假吏胥之手
事竣彙案

奏請獎勵臣等惟有盡心盡力督屬撫綏務期民
無失所以副

聖主惠養黎元至意現屆仲冬晴暄已久正盼祥霽

適於冬至日彤雲密布瑞雪繽紛積厚寸餘民
情悅豫謹附片奏

聞仰慰

聖懷奉

硃批知道了

請撥鄰省銀兩疏

奏為蘇州藩庫耗羨因災蠲緩不敷支放循照成
案奏請撥濟仰祈

聖鑒事竊據蘇州布政使王輅詳稱司庫耗羨項下
應支道光四年額定廩工文武各官養廉並一
切公費雜支等項約須銀二十二三萬兩又災
缺本年各屬官役俸工養廉約需銀五萬餘兩
統共需銀二十八萬餘兩緣蘇松等屬本年被

水成災應徵地丁耗羨暨各年災緩及來年上
忙新賦業蒙

恩旨分別蠲緩又成災五分以上之吳江等州縣熟
田應徵錢糧亦經援例詳請

奏明緩徵其餘熟田應徵錢糧為數較少且歉年
花戶未免完納不前難以照數徵解卽以本年
下忙來歲上忙應徵熟田並秋後隨正徵收各
項耗羨及揚海二關額解盈餘江蘇兩糧道解

司耗羨約共抵支銀十萬餘兩計不敷銀十八萬餘兩現在司庫耗羨本欸僅存銀一萬八百餘兩應留為本年歲內待支之欸如有不敷尚可於減半平餘欸內借動湊發惟來歲一切應支要欸及本年災缺俸工養廉等項核計短絀甚多自應預為籌撥伏查江寧司庫嘉慶十八二十五年及道光元年並本年三月均因耗羨不敷支放奏請在於鄰近省分協撥濟支有案

所有蘇州司庫現存災缺耗羨不敷應請

奏明在於鄰近省分協撥銀十八萬兩解蘇濟用
等情前來臣查蘇松等屬本年因災蠲緩輸將
較少來歲司庫耗羨待支各款不敷濟放係屬
實在情形自應預籌撥濟惟有循案奏懇

天恩飭令部臣在於鄰近省分酌撥銀十八萬兩解
交蘇州藩庫以濟支放謹會同協辦大學士兩
江總督臣孫玉庭合詞恭摺具

奏伏乞

皇上聖鑒訓示奉

硃批戶部議奏

審擬沛縣民袁欣祖京控疏

奏為遵

旨秉公審訊定擬奏請

聖鑒事竊照江蘇沛縣民袁欣祖赴京呈控漕書任
如秀等勒折漕米並委員放賑少給戶口等情
一案經步軍統領衙門奏奉

諭旨此案着交韓文綺親提人證卷宗秉公審訊按
律定擬具奏原告袁欣祖該部照例解往備質欽

此旋准兵部將原告袁欣祖遞解前來遵卽飭
提人卷至省臣隨核卷逐一親審緣袁欣祖籍
隸沛縣有管業田十八畝分給伊子袁涌安等
耕種卽係伊子戶名完糧因地畝無多又俱瘠
薄衣食不週時與伊子求乞度日道光二年該
縣被災分別蠲緩查辦賑務派委教諭沈承愈
按戶放賑填票給發袁欣祖之地亦因被災緩
徵並未完納漕糧又該處當舖每至十二月初

一日起至除夕止當本在五兩以內讓利一日
袁欣祖於是年冬間將衣被等物先後在相思
義宋德陞二典分當錢文至次年二月二十四
日持票取贖該典照例按月算利袁欣祖欲圖
讓利未允心懷不甘又袁欣祖曾向監生丁際
和假錢無還嗣復屢假不允因丁際和之兄丁
潤曾充該縣民壯疑係身家不清並訛聞放給
賑票之委員沈承愈每戶止給一大口及銅山

縣委員查賑需索錢文之語起意混控隨又添砌屢借不遂有嫌之沛縣漕書任如秀等及銅山縣漕書盧步雲勒折漕米等情赴京在步軍統領衙門呈控奏奉

諭旨交臣審辦提集人證訊悉前情誠恐任如秀等果有浮收短放情弊復又逐款詰實不但衆證全虛該原告亦毫無憑據尙指自悔虛誣據實供吐反復推求案無遁飾查例載驀越赴京告

重事不實發邊遠充軍等語此案袁欣祖所控各情均訊悉子虛罪應反坐惟該犯解案之初不待質問卽已深自悔悟俯首認咎情近自首似應酌減問擬袁欣祖應於薊越赴京告重事不實軍罪上量減一等擬杖一百徒三年年逾七十照律收贖漕書任如秀盧步雲等訊無浮折丁潤充當民壯並未捐監其弟丁際和亦未在縣充役均無朦捐情事應與並未違例取利

之典商相思義宋德陞均免置議教諭沈承愈
奉委放賑訊無少給戶口情事亦毋庸議袁欣
祖借欠丁際和錢文為數不多且該犯年老赤
貧並免追償除供冊送部外臣謹恭摺具

奏伏乞

皇上聖鑒訓示奉

硃批刑部議奏

審明銅山縣民姜海京控片疏

再銅山縣民姜海赴京呈控僧文貝喝令李二東等鎗扎伊兄姜河身死並未緝兇治罪一案經步軍統領衙門奏奉

諭旨交臣提審遵卽查核原案緣姜海長兄姜大凝係僧文貝舊佃上年正月初一日姜大凝令子姜兌赴寺拜年文貝以姜大凝輕視田主僅令幼子往拜心不輸服初三日早文具路遇姜海

次兄姜河卽以姜大凝不徃拜年隨口混罵姜河回詈文貝邀同李二東周勳杜文光等各挈鎗棍圖毆洩忿姜河與姜海並弟姜四等亦各持仗出抵文貝喝令李二東等毆斃姜河殞命姜海亦被杜文光用鎗戳傷姜四將周勳毆傷文貝畏罪因見周勳受傷起意商允李二東等致死周勳抵制李二東密邀李鳳奇相幫將周勳砍擗立斃李二東等脫逃報驗挈獲文貝李

鳳竒審擬將文具依律擬斬監候李鳳竒擬流
逸犯李二東等緝獲另結等因

題准部覆在案臣親提姜海訊據供稱前見僧人
文具收禁不知問擬何罪又因李二東等在逃
未獲恐胞兄姜河無人抵命是以赴京具控等
語臣當將兇犯文具業經問抵擬斬李二東等
現在嚴拏向姜海明白曉諭該原告伏地叩頭
卽稱兄命有抵心已輸服情愿具結當卽釋令

回籍查此案早經題結今原告亦已俯首無詞
所有犯證人等自可無須再行提省覆審以免
拖累除仍飭勒緝逸犯李二東等獲日另辦外
理合附片奏

聞奉

硃批刑部知道

遵 旨察看災區請加接濟疏

奏為欽遵

恩旨察看災區實在情形應請來春酌加接濟緣由
恭摺奏祈

聖鑒事竊照道光三年十月初三日奉

上諭江蘇上元等州縣被水來春應否接濟之處查
明奏聞等因欽此 臣等跪讀

恩綸仰見

恭壽堂奏議

卷五

六

聖主軫念災黎有加無已當卽恭錄轉行欽遵確查
去後茲據江寧布政使張志緒蘇州布政使王
輅查明各州縣情形詳請核

奏前來臣等伏查本年江蘇省夏潦異常凡上元
等四十七州廳縣衛田廬被浸旣廣且多為近
年所罕觀節經奏荷

鴻慈卹賑兼施錢漕並緩運米則概行免稅隆冬復
賞給口糧以情形較重之年沐浩蕩非常之

澤不但小民頌戴萬口同聲卽臣等動支百十萬
帑金亦倍覺交相感動茲復重荷

垂詢令加體察祇承之下欽佩難名現屆開放正賑
之時臣等目覩閭閻安集戶少流移卽例不給
賑之貧民已飭將紳富捐輸之項或設廠寬期
賁賑或按戶散給錢文鄉鎮民戶亦各勸捐調
卹約至來年正二月間似可無虞失所惟查上
元江寧句容高淳六合江浦江都儀徵吳江震

澤常熟昭文崑山新陽青浦太倉鎮洋共十七
州縣成災十九八七分戶口較繁災分較重來
春青黃不接之時誠如

聖諭恐民力不無拮据自應酌加接濟又長洲元和
吳縣華亭婁縣金山江陰等七縣被災稍輕除
十分九分次貧戶口歸入捐賑辦理外尚有極
貧戶口亦須量子接濟又銅山縣成災五分之
四百九十五莊豐縣勘不成災之辛村等十一

里沛縣成災五分之防一等十二里及勘不成
災之千一等四里睢寧縣勘不成災之木橋等
十八社並揚州衛坐落江都儀徵徐州衛坐落
銅山豐易乏食貧民軍佃該處均係積歉之區
口食維艱體訪輿情亦需接濟合無仰懇

天恩俯准將上元等三十州縣衛極次貧戶口
加賞口糧一月俾各接濟有資民咸飽

德此外各屬貧民業邀正賑復領捐輸佐賑似可待

至麥秋不致乏食臣等仍當察看情形臨時再
為酌辦所有查明災屬應需接濟緣由謹合詞
恭摺具

奏伏乞

皇上聖鑒訓示奉

硃批候旨施行

籌備災缺兵匠等糧疏

奏為籌備災缺兵匠等糧請截熟田漕米撥補恭
摺奏請

聖鑒事竊照本年江蘇各屬被災較重應徵銀米業
經臣等奏蒙

恩准分別蠲緩所有道光四年分應放旗綠各營兵
糧等項均因災缺據江寧藩司張志緒江安糧
道湯藩會詳稱本年司倉應需八旗綠營暨織

造機匠口糧並恤孤各項正閏等米除熟田應
徵並蘇州安徽各屬編款米石抵支外核計省
倉及漕河糧奇等標各營共計不敷米五萬石
又道倉南撫米石並幫丁行月等米共一萬八
千石請於附近省倉及雜標營較近之江揚各
屬本年應徵熟田漕糧內截留備抵又據蘇州
藩司王輅糧道楊本昌會詳稱綠旗各營兵米
織造局糧各屬恤孤等款共缺米六萬七千六

百一十五石零請於蘇屬之長洲元和吳縣暨
松屬之華亭婁縣熟田應徵漕糧內截畱以濟
支放各等情詳請具

奏前來臣等伏查兵匠等糧計口授食今因災缺
必須預籌若循例採買不但司庫無款可動抑
且接壞災區有妨民食至各屬常平倉穀先已
因災平糶所餘無幾應備來春青黃不接之需
惟此截撥熟田漕糧屢經奏准辦理有案該司

道等循例具詳現既兵食有資而遞年成熟徵
還於額運漕糧仍可補足一轉移間似與軍民
兩有裨益合無仰懇

皇上天恩俯准於就近江揚蘇松等屬熟田漕糧內
按數截畱以便濟放統俟各屬按限帶徵陸續
撥還搭運清欸至應減軍船由該糧道另行議
詳咨部外臣等謹會同漕運總督臣魏元煜合

詞具

奏伏乞

聖鑒訓示

再行遵 旨確查據實覆奏疏

奏為遵

旨再行確查據實奏請

聖鑒事竊 臣接承

廷寄道光三年十月二十一日奉

上諭本年四月間淮商鄭同瑞以總商黃濬奏侵欺
庫項列欸赴京呈控當交韓文綺會同延隆秉公
審訊業經該撫等查照單開各欸逐一根究均無

弊混將鄭同瑞量減擬徒黃滌泰革退總商具奏
矣黃滌泰充當總商多年其經手鹽課帑項數累
千萬恐挪移朦混在所不免朕風聞尚有不實不
盡之處必須澈底究辦不可遂其侵欺之計着韓
文綺接奉此旨再行確加查訪如該商果有前項
弊竇立即懲辦據實具奏欽此遵查鄭同瑞呈控
黃滌泰一案經臣會同臣延隆查照單開各款
核卷訊供並無弊混定擬具

奏嗣蒙

殊諭發下批摺一件交臣嚴密訪查復經徧訪確查
親提密訊黃滌泰別無罪狀請仍照前奏將黃
滌泰革退總商作為散商隨同辦運伏候

聖裁於十月二十四日覆

奏在案茲於十一月初一日承准軍機大臣傳奉
諭旨前來恭查係在臣覆奏未到之先臣又敬繹

聖諭黃滌泰充當總商多年經手鹽課帑項數累千

萬臣不敢以節次查無弊混遂不復再事推求
惟前就鄭同瑞所控臣與延隆逐款查卷已有
數十宗之多分別鈎稽連旬逾月此外未控款
目不但文卷繁多浩如烟海抑且運庫收放日
逐需查勢不便通提冊檔窒碍難行若復傳質
衆商更虞拖累臣再四思維查運司張青選到
任未久人亦結實可靠且係前任之事無所用
其迴護臣卽諄札密委令其澈底根究去後茲

據稟稱經收鹽課係運司專責商人逐卯所納
錢糧均報鹽院一切支項係詳奉批准始行動
放商人無從干預且兩淮係先課後鹽絲毫不
能通融滋弊其借領

帑項查有嘉慶六年廣儲司銀庫發商生息項下
黃滌泰承領銀十萬兩本利已陸續全完又借
領漢岸苗疆生息銀十萬兩已彙入專商借領
項下分綱徵還黃滌泰充總三十餘年借項未

完只十萬兩較各總商為獨少其借領辦

貢辦公銀兩歷係商納商支業經錢陞司等審明
勒令獨賠三十萬兩此外逐細詳查實無經手
隱混事件現在清查運庫如有不實不盡前後
互異之處豈能任其朦混不據實查辦之理並
將黃滢泰充當首總及領過銀數各卷宗申送
到案均核與所稟相符正在辦理間接到前次
會同審擬及臣密查覆奏摺各一件欽奉

上諭一道將鄭同瑞量減擬徒黃濬泰革退總商仍
畱散商隨同辦運等因臣跪誦之下仰見我

皇上鑒空衡平懲詐卹商之至意臣伏思運庫現已
清釐該運司所稟黃濬泰實無隱混之處自屬
可信且督臣孫玉庭鹽臣曾煥實心辦事久在
聖明洞鑒之中應請

旨飭令隨時就近稽查整飭俾虞詐之風盡革則
務得有起色矣理合據實覆奏伏祈

聖鑒訓示奉

硃批所奏俱悉

續獲邪教案内逸犯疏

奏為續獲山東省傳習邪教案内逸犯審明定擬
恭摺奏祈

聖鑒事竊查嘉慶十九年山東撫臣審辦邪教人犯
狄珍等一案原奏聲明逸犯狄珍等行令各督
撫嚴緝務獲審擬另結節經飭緝在案茲據邳
州知州李衢詳報掣獲形跡詭秘之狄珍一犯
搜查並無不法字跡訊據供認聽從先獲擬結

之狄珍習教傳徒希圖獲福並無不法重情錄
供通詳經臣批飭確審擬解去後茲據徐州府
知府俞頴達飭委銅山縣知縣高攀桂會同該
州李衢審明定擬由府司覆審招解前來臣卽
提犯親鞫緣狄玠籍隸山東蘭山縣與先獲監
斃之狄珍係小功堂兄嘉慶十一年九月有先
獲監斃素習兇卦教之直隸清河縣人孫起洛
時赴狄珍莊上售賣棉花與狄珍認識卽勸引

入教狄珍先後勸令狄珍與已獲之狄興楊勝
楊三黑王汝蘭王汝梅並未獲之杜子禮七人
均拜孫起洛為師稱為總當家狄珍等希圖獲
福允從孫起洛用紙一張圖畫人形指點講解
稱天是一大人是一小天每日按早午晚時
候兩手抱胷盤膝打坐運氣默念真空家鄉無
生父母現在過去未來彌勒十六字凡遇同教
無論曾否識面止須揚問一聲在裏嗎其人答

應在裏卽知係同教狄玠等照依教法學習年
餘轉傳已獲之解作周姬廷宗李克得劉伯良
劉倚劉成斌並未獲之狄方如為徒狄方如等
曾送給狄玠零星食物並未給錢嗣劉伯良又
轉傳已獲之楊起賢等五人該犯等每年於秋
收後各送給孫起洛錢一二百文不等並無確
數名為如意錢同教中家有地畝力能照管者
稱為當家能傳演教法者稱為領法因孫起洛

託狄珍照應同教均稱狄珍為當家各人所送如意錢俱交狄珍彙送十六年十一月狄珍囑狄玠送過孫起洛銀八兩至十八九年間同教之王言得等被嶧縣等處挈獲狄珍因孫起洛曾有入教後如被挈獲卽差人往求解救之言遂令狄玠與杜子禮往找孫起洛求救豈知孫起洛並無解救之法該犯當卽回歸潛匿經蘭山縣將狄珍及狄興等挈獲審辦並飭緝逸犯

狄玠等狄玠聞挈畏懼並因王言得等均被正法始知習教無益心中悔悟不敢再習亦未另行傳徒卽改名劉玉琢因幼曾學醫在各處給人治病隨時得受謝禮錢數十文及一二百文不等隨醫隨走並無認識之人夜宿空廟涼亭亦無一定住址及知情容畱之家本年三月間狄玠逃至邳州卽經兵役挈獲審悉前情臣以該犯習教傳徒且在逃八九年之久恐另有為

匪不法及復行傳教惑眾情事嚴行究詰加以刑嚇矢口不移案無遁飾查律載左道異端之術煽惑人民為首者絞監候又嘉慶十九年新例內載凡傳習八卦等邪教習念荒誕不經咒語拜師傳徒惑眾者首犯擬絞立決又律載凡律自頒降日為始若犯在已前並依律擬斷又律註云如事犯在未經定例之先仍依律及已行之例定擬若例應輕者照新例遵行各等語

此案狄玠聽從先獲監斃之狄珍入兌卦邪教
復傳徒解作周等七人卽屬為首若照嘉慶十
九年新例應擬絞決惟該犯入教傳徒均在十
九年定例以前照律罪止絞候且前獲同案入
教傳徒之狄興等均奉

諭旨改為絞候該犯狄玠情罪相同應照律註仍依
本律定擬狄玠合依左道異端之術煽惑人民
為首者絞監候律擬絞監候事犯在嘉慶二十

五年八月二十七日

恩詔以前惟係邪教應不准援免該犯逃後訊無知
情容畱之人亦無另犯為匪不法及復行傳教
惑眾情事應毋庸議逸犯杜子禮等嚴飭勒緝
獲日另結所有掣獲鄰省八卦教內傳徒惑眾
人犯應敘職名係邳州知州李衢相應開報聽
候部議仍飭查協獲武職照例咨部除將全案
供招送部外所有審明定擬緣由臣謹會同協

辦大學士兩江總督臣孫玉庭合詞恭摺具

奏伏乞

皇上聖鑒訓示奉

硃批刑部議奏